

Critica tur caminda

Pueblo ta haya AZV un desastre di Milenio

ORANJESTAD (AAN) Sopi pura ta sali salo y ora cu e bieunan na Aruba hala bo atencion cu tipo di dichonan asina bo mester tene cuenta cu experiencia di bida ta algo cu ta para manera un baranca firme den laman y ta pesey pueblo no por a compronde pakico ministro Posner cueste loke cueste mester a pusha AZV entrante 1 di Januari e aña aki y pakico no por a warda te ora cu tur cos ta bon regla.

Na Hulanda mes caminda cu pa decadanan largo caba nan tin di haber cu un sistema cu mas bien ta parce esun di SVB na Aruba, aya mes nan a opta pa warda te 2004 pa introduci un sorto di AZV manera e y sabionan na Aruba den pura a kere di por hisa benta riba lomba di pueblo cu tur consecuencia cu esaki tabata tin pa pueblo y loke tabata bisto tambe.

Hulanda cu tanto experto, tanto experiencia y sigur un monton di placa pasobra nan ta un pais rico y nan economia ta draai mihor cu nunca, nan mes ta hopi cauteloso pa introduci un AZV manera cu Aruba su gobierno tabata tin planea pa haci y pa colmo na Aruba nan a logra esaki tambe na un forma manera ladron den anochi pusha riba lomba di pueblo sin cu realmente tanto pueblo como gobierno tin placa pa sostene un AZV pa añanan largo.

Hopi hende tabata teme pa cu introduccion descabeya di AZV y e consecuencianan y ata awor e berdad y realidad di bida ta haci dolor den pueblo y no caminda e mester haci dolor, esta cerca e gobernantenan cu a pusha AZV pa meta di campaña politico.

DIARIO ta publica awe mas di criticanan cu tin den pueblo riba AZV y e momento a yega cu gobierno mester bay sinta pensa bon y evalua bon te con leu nan kier bay cu AZV pasobra si den e prome luna caba cos a cumenza bruha y preta mahos, anto ta con ta para aki un o dos aña, siendo cu mayoria hende ta teme caba pa e prome 6 lunanan di AZV e aña aki.

For di pueblo, DIARIO a haya ayera hendenan rabia cu tabata puntra ta di ki igualdad ministro Posner ta papia di dje na momento cu Logopedistanan a hala su atencion y pone na su lugar pa

Posner den pura core bay declara cu pa ambtenaarnan si tin pago di AZV pa servicio di Logopedistanan?

Otro hendenan no ta conta pa Posner y AZV?

Con a para cu resto di pueblo pa cu servicio di Logopedistanan?

Ta parce cu den dia cla AZV a para bira un instrumento politico cu e ministro por core cambia manera cu e ta haya ta bon y tambe ora cu e ta haya ta bon pasobra manera un parti di seno medico bay den protesta contra AZV, ta mesora den pura e ministro ta core bin cu cambionan y asina henter e asunto di AZV ta bay manera un bala di ping pong di un banda pa otro, lubidando cu ta pueblo, kende ta e pagador di e gastonan di AZV, ta e bala di ping pong di politiconan awor.

Esnan cu tabata tin aseguro priva a haya nan mes para manera hendenan sin tera sin bandera y awor nan ta haya di tende cu pa ambtenaarnan si tin cierto servicicionan di AZV y pa e resto di pueblo no y

asina nan ta puntra nan mes unda e igualdad cu AZV mester a trece cune a keda y ta cu ki cara ministro Posner por keda pretende cu AZV ta algo pa nos tur, si e mes cada biaha ta cambia cos pa privilegia cierto senonan na Aruba?

Unda nos parlamentarionan a keda ora cu nan a caba di trata y acepta e begroting 2001 pa cu Salubridad Publico y no tabata tin nada reglamentada eyden pa cu AZV y algun dia despues ta schors e reunionnan di begroting pa trece un ley pa introduci AZV pa 2001 mientras esaki no ta poni riba begroting?

Ora cu hendenan tende director di AZV papia y scucha con e ministro ta papia y haci cu AZV, nan ta puntra nan mes ta pa ken AZV realmente ta?

Director di AZV ta papia di esnan cu tabata tin carchi di SVB, Garantia etc. por sigui uza esaki por lo pronto, pero ta lubida esnan cu nunca a opta pa AZV y cu nunca por a haci uzo di locual cu e director ta refri na dje.

Ta parce cu esnan cu tabata segura via seguro particular awor diripiente a perde tur locual nan tabata tin na derecho y tambe loke nan a paga pe y cu awor diripiente nan no ta conta mas den comunidad.

Kende ta bay para responsabel pa e dafia y perdida grandi aki y con gobierno lo keda para sin mayan e prome casonan worde lanta den corte pa cu perdida di seguro particular di esnan cu pa decadanan largo a paga nan prima di seguro particular y awor a perde nan seguro?

Asina pueblo ta sigui reclama cu AZV no ta pa trato igual y cu ya pueblo por nota bon cla cu di un dia pa otro ministro ta cambia regla y ta beneficia un grupo riba otro den comunidad.

Loke pueblo ta haya mas doloroso ainda ta e hecho cu ministronan y specialmente esun di Salubridad Publico ta gaba cu e ta contento cu implementacion di AZV siendo cu tur hende ta nota con mal regla cos ta y na lugar cu e mandatario aki tene honor na

su mes y acepta y realiza cu el a pega barco y baha na awa, e ta keda pega barco y pregunta ta; te con leu AZV por zink den pueblo?

Despues di eleccion Posner aparentemente no lo bolbe mas riba pantaya politico, pero pueblo a keda pega cu e batata cayente di AZV cu tanto fanfaria y buya mester a worde pusha riba lomba di pueblo.

Ki mishi bo ta obliga tur hende pa bay cay bao di AZV y tin famia cu a bay docter pa haya trato y nan a haya di tende cu nan no ta riba lista di docter cu a bin di AZV, pero si esnan den famia cu a muri dia bieu ta riba lista pa haya tratamiento di docter; esaki ta algo cu bo por ta orguyoso di dje?

Mescos cu abogado Sjiem Fat awe ta cuestiona fuertemente e posicion descabeya cu Duke Croes di AVP a tuma den e caso di FOL, mescos pueblo ta cuestiona fuertemente loke ministro Posner a haci cu AZV.

Posner mester saca su conclusion politico.

WAAK PA ABO TAMBE TIN PRUEBA!!

